



19. november 2020  
Atassut

UKA 2020/30  
Aqqalu C. Jerimiassen

**Nunatsinni, Namminersorlutik Oqartussat pilersitaannik, Namminersorlutik Oqartussat oqartussaaffigisaannik aningaasaqarnermik ingerlatsivinnik, soorlu aalisarnermut aningaaseriviliornissamik, kreditforeningiliornissamik, pensionskarsiliornissamik aammalu sillimmasiisarfiliornissamik pitsaaqutaasussat akimmisaarutaasussallu pillugit Naalakkersuisut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut. Aallartitsinermi aningaasarsiornerup silarsuaani naatsersuutigineqartut, ass. pisortanit aallarnisarnermi aningaasaliissutaasussat aammalu sulisoqarnikkut pisariaqartinneqartussat nalunaarusiami pingaartillugit ilaatinneqassapput.**

(Inatsisartunut ilaasortaq Henrik Fleischer, Siumut)

Aningaaseriveqarnikkut aningaasarsiorneq tassaavoq nunarsuarmi niuffaffiit tamatsinnut sunniuteqarluinnartut annersaattut taaneqarsinnaasoq.

Nunalli namminneq aningaasaveqarnermikut ingerlaneq aqunnialeraangassuk unammilleqatigiinnikkut peqqinnangitsumik ingerlajartortoqalersarteq, nunallu iluani inuussutissarsiornikkut innarliartulersarteq naluneqanngilaq.

Taamaammat uani aningaaserivimmik nunatta nammineq ingerlataani pilersitsinissami mianernartoqarnera eqqaamalluinnartariaqarparput, tassami nammineq aningaaserivimmik aallarnisaanarutta pisariaqarmattaq aningaasaateqarfinnik allanik suleqateqaqqaarnissaq, tassami nunarput namminerisaminik nunatut aningaaseriveqanngilaq (nationalbank), aningaasaliiffissamik minnerpaamik suleqateqartigata nunatta aningaasaqarneranut annertungaatsiartumik atuiffiusinnaanera aarlerinartoqarmat.

Aningaaseriviit nunani allani aallartittarsimapput soqutigisaqatigiit namminneq kattullutik ammaajartuaarneratikkut, uanilu maluginiaqqullugu, tassalu pisortanut pituttorsimangivillutik namminneq aningaaserivittaarnissartik aningaasaleeqatigiinnermikkut anguniartarsimavaat, assersuutitut atulaariaraanni soorlu; Danske Bank, maanna qallunaat nunaanni aningaaserivinni annerpaalersimalluni, nunarsuarmilu Forbes-ip allattorsimaffiani aningaasarsivinni 500 annerpaat akornganni ilaallunittaq, aallarteqaaramilu qallunaat nunaatillit aningaaseriviattut aallartissimalluni.

Uagut nunatsinni aalisartut piniartullu kattuffeqartilluta taakkua suleqatigilluarneratikkut, nammineq suliaminnik aallutaqartuusut aningaaserivittaarsinnaanissaminnik aallartisersinnaanissaat ilimanaateqarluarsinnaavoq, aalisarnermimi aningaasarsiorneq arlalippassuarni ingerlalluarpoq akingissaarfiusumik inissisimalluni, tassuunakkullu nunat allat

assingalugit nunatsinni aalisartortagut namminneq aningaasaleeqatigiinnermikkut pisortanit pituttorsimangilluinnavissumik ingerlalersinnaammata aningaasarsiornermikkut.

Alloriarneq nutaarluinnaq anguneqarsinnaanngussangaluarpoq aningaasarsiornermikkut nunatta oqaluttuarisaanerani, tassalu namminersortut aalisartuusut nunatsinni aningaaseriveqarnikkut namminneq akilikkaminnik aningaasalersukkaminnik aningaaserineqalerpata.

Pisortanik suleqateqarsinnaanissami Greenland Venture suleqataasinnaanissaa aningaasalersuinissakkut periarfissaalluarpoq, aallartinnermimi aningaasaqarnikkut eqqanaarutitut atornerqarsinnaammat.

Nunatsinni inuussutissarsiutit pingaarsaat sapinngisamik pisortat ataani aningaasalersorneqarnikkut aningaaseriveqarneratigullu tapunnaversaartigu, taakku aqutissiuutariaqarpagut namminneq pilersitsinissaannit.

Assersuut, "Aalisartut aningaaseriviat" namminersortutut ingerlanneqalerpat, aningaaseriviup namminerisaminik sillimmasiisarnikkut, utoqqalinersiaqarsinnaatitaanikkut, pisassaaruttoorfimmi eqqanaarutissaqarnikkut, sulisinnaajunnaarallarfimmi ajoqusernikkut matussutissaqarsinnaanissamut allarpassuarnillu periarfissaqalersitsisinnaammat pisortat isumalluutiginnikkaluarlugit.

Taamatut oqaaseqarluta Atassummit siunnersuut itigartinneqarnissaa innersuupparput, naalackersuiullu allannguutissatut siunnersuutaat ataatsimiitsitaliamut innersuullugu.